



8. Question élargie n° 63 de M. Gilles Roth relative à la rétention de données

■ **M. Fernand Etgen, Président.** - Den nächste Punkt vun haut ass déi erweidert Fro Nummer 63 vum Här Gilles Roth iwwert d'Datespeicherung. Den Auteur vun der Fro, an ech widderhuelen et, huet fënnef Minutten, fir seng Haaptfro ze stellen an no der Äntwert vum Minister eventuell eng Zousazfro ze stellen, an der Regierung stinn zéng Minutten zou. Här Roth, Dir hutt d'Wuert.

■ **M. Gilles Roth (CSV).** - Merci, Här President. Dir Dammen an Dir Hären, déi sougenannte Vorratsdatenspeicherung huet méttlerweil e laange Baart, och hei zu Lëtzebuerg.

Schonns am Dateschutzgesetz vum 2002 war virgesinn, dass d'Justizautoritéiten am wäitste Sënn vum Wuert konnten iwwert d'Telekommunikationsoperatoren op d'Identitéit vun Abonnenten an Notzer zrëckgräifen.

2005 kouw et dunn zu enger éischter Ausweidung vun dësem Regimm, nämlech zwielef Méint sollten d'Justizautoritéite fir all méiglech stroferechtlech Fakte kënnen op Trafick- an op Lokalisationsdaten zrëckgräifen.

2010 huet Lëtzebuerg eng europäesch Direktiv vun 2006 iwwert dës Datespeicherung an nationaalt Recht ëmgesat. Wéi eng Date mussen dann zu Lëtzebuerg gespäichert ginn?

Par rapport zu 2005 huet de Spektrum vum gesamten Daten net geännert. D'Date sollen awer just nach während sechs Méint gespäichert ginn. Dat ass de strikte Minimum, deem d'Direktiv virgesinn huet. An d'Späicherung betrëfft och net méi all stroferechtlech Handlung, mee just nach déi, déi eng Prisonsgestrof vu méi wéi engem Joer mat sech zéien.

Lëtzebuerg huet, entgéint zu Tendenzen an anere Länner, seng Legislatioun am Sënn vum Schutz vun der Privatsphär an och vum Dateschutz iwwerschafft deemools. Nach ass et esou, dass den EU-Gerichtshaff vun Kierchbierg déi Direktiv vun 2006 gekippt hat an dat am sougenannten Digital-Rights-Urteel. D'Riichter halen an hirem Urteel fest, dass, souguer wann déi gespäichert Daten näischt iwwert den Inhalt vun de Kommunikatiounsaktiounen aussoen, d'Späicherung vun de genannten Daten e ganz graven Aschnëtt an d'Grondrechter vun de Bierger bedeit an net verhältnisméisseg ass. Den Europäesche Gerichtshaff schwätzt vun engem on-differenzierte Sammelen an Hale vun dësen Daten.

Weider gouf och monéiert, dass d'Direktiv net géif virschreiwen, dass déi gesammelt Daten um Territoire vun der EU misste gehale ginn, eppes wat een am Liicht vun dem Safe-Harbor-Accord mat den USA an dem Urteel Schrems aus dem Joer 2015 sollt appreciieren.

Dir Dammen an Dir Hären, nom Digital-Rights-Urteel ware sech zu Lëtzebuerg déi meescht Acteure relativ séier eens. Eis Gesetzgebung, déi bái Wäitem net esou wäit gereecht huet wéi déi däitsch oder brittesch Reegelen, soll awer iwwerschafft ginn. Dat hat sengersäits och den deemolegen an haitege Premier- a Staatsminister esou annoncéiert. Parallell derzou sollt alles drugesat ginn, fir nach ënner Lëtzeburger EU-Présidence eng gesamt-europäesch Léisung ze fannen.

A wat ass zantherier geschitt? Abee, néng Méint nom Urteel gouf d'Chamber mat engem Gesetzesprojet saiséiert an dëse Projet gouf och gläich an dräi Kommissionsitzungen diskutéiert, déi leschte Kéier iwwregens schonns den 9. März 2016. Am Procès-verbal vun där Sitzung heescht et zum Schluss: « La continuation de l'examen du projet de loi figurera à l'ordre du jour d'une prochaine séance de la Commission juridique, une fois que le Ministère de la Justice », also dat war 2016, viru véier an engem hallwe Joer, « a recueilli les informations requises. » Esou eng Sitzung huet awer nach ni stattfonnt.

Här President, dat ass dach erstaunlech fir eng Regierung mat bloer a grénger Bedeelegung, déi sech nach 2010 géint e Gesetz ausgeschwat huet respektiv sech enthalten huet. An et ass och ëmsou méi erstaunlech, wou den Europäesche Gerichtshaff sech dach eigentlech de Mond fuseleg riet an a reegelméissegem Ofstänn eng Lanz brécht fir d'Grondrechter vun eise Bierger.

Ech wëll hei just zwee Urteeler zitieren: dat sougenannt Tele2-Urteel vum 21. Dezember 2016 an en Urteel vum 6. Oktober 2020, also e ganz rezent, dat souwuel eis belsch wéi och eis franséisch Nopere betrëfft.

Den Tenor ass bestëmmt dee selwechten: Et muss Schluss si mat enger genereller, on-differenzierter Speicherung vun den Daten! A mir mengen, dass et un der Zäit wier, ee fir alle Mol hei ze legiferéieren.

An duerfir wëlte mer vun der Madamm Ministesch - ech hunn nach genau eng Minutt - wëssen, ob si weider hannert dem Gesetzesprojet 6763 steet, ob der Chamber deemnächst Upassunge vun deem Gesetzesprojet proposéiert ginn a wa jo, wéi eng.

Ech mengen, wann een zanter 2016 un dësem Projet schafft, da misst een haut à même sinn, derzou Detaillere ze ginn. Sollt dat net méiglech sinn, invitéiere mer d'Madamm Ministesch an eng nächst Kommissionsitzung.

Dat gesot si mer och der Meenung, dass et wichteg ass, dass d'Chamber Abléck kritt an d'Aarbechte vun dem sougenannte Working Party on Data Retention, e Gremium, deem am September 2020 ënner däitscher EU-Présidence an d'Liewe geruff ginn ass an, wéi den Numm et seet, sech mat der Vorratsdatenspeicherung sollt befaassen.

Här President, Dir Dammen an Dir Hären, mir feieren dëst Joer den 20. Gebuertsdag vun der EU-Grondrechtecharta an et geet net duer mat renge Lëppebekenntnisse an et ass elo Zäit, dës Grondrechter och konkret an Aktioun ze setzen. Punkt.

■ **Plusieurs voix.** - Très bien!

■ **M. Fernand Etgen, Président.** - Merci villmools, Här Roth. D'Regierung huet d'Wuert, d'Madamm Justizministesche Sam Tanson.

■ **Mme Sam Tanson, Ministre de la Justice.** - Jo, merci, Här Roth, fir déi Fro. Effektiv, dat mat de Grondrechter, dat ass eppes, wou et net nëmmen drëms geet, haut zum Beispill - ech gesinn d'Kärz hei hannert mer - drun ze denken, mee se an alle Beräicher an net nëmmen den e bësse méi theoreteschen och probéiere konsequent ëmzesetzen.

(Mme Sam Tanson fait référence à la bougie allumée sur le bureau de la présidence rappelant la Journée internationale des droits de l'homme.)

Wat elo déi faméis Vorratsdatenspeicherung ublaangt: Ech stinn net méi hannert dem Projet 6763, well en net wäit genuch geet. Firwat ass dat zënter 2016 net weidergaangen? Et war gewosst, also fir d'éischt, Dir hutt et richteg gesot, ass jo emol eng ganz Zäitchen drop gewaart ginn, dass mer eng europäesch Léisung géife kréien.

Dat ass extreem schwéier. Mir diskutéiere reegelméisseg bei bal all Conseil iwwert deem dote Sujet. D'Meenunge gi vun A bis Z an et ass extreem schwéier, do jiddwereen op e gemeinsamen Nenner ze kréien. Ech hunn d'Hoffnung net opginn, mee ech sinn awer der Meenung, mir kënnen net méi op déi europäesch Léisung waarden a mir mussen hei aktiv ginn.

Da war gewosst, dass nach aner Arrëten en cours waren, an et war och gewosst, dass déi elo sollten dëst Joer gesprach ginn. Am Hierscht ass drop gewaart ginn a verschidde Parteien hate sech erhofft, dass dann do vläicht géife Klarifikatiounen kommen oder dat vläicht géif anescht gesi gi wéi bei den Arrëten Tele2. Et ass och esou, dass Klarifikatiounen komm sinn. An duerfir ass et am Fong och gutt, dass mer nach keen Text definitiv op den Instanzewee ginn hunn, well mer dee Projet, deem eebe virun e puer Joer op de Wee bruecht ginn ass, mussen komplett iwwerschaffen.

Den Arrêt Quadrature du Net vum 6. Oktober 2020 confirméiert nach eng Kéier, dass mer net däerfe generell Date sammeln. Et sinn e puer Exceptiounen virgesinn. Et ass op där enger Säit virgesinn, dass ee kann Date generell sammeln, wann et ëm national Sécherheet geet, wann déi am Spill ass. An da kann een och nach a vläicht e bësse manner gravéierende Fäll, also wann et ëm Criminalité grave geet an d'Preventioun vu Menaces graves, bei Kategorië vu Leit, unni dass et däerf diskriminatoresch sinn, dat maachen oder eeben eppes lokal aschränken.

Dat heescht, mir kruten hei déi Prezisiounen, déi mer bis elo net haten. Ech hat och direkt nom Arrêt eng éischt Aarbechtsreunioun mam Parquet général, fir ze kucken, wéi mer dat heite kënnen a Musek ëmsetzen. Ech hunn och scho mam SRE (ndlr: Service de renseignement de l'État) en Echange gehat, fir och mat hinnen do ze diskutéieren. An ech muss och nach weider déi Echangé féieren.

A mengen Aen äntwert de Projet de loi 6763 net méi op déi prinzipiell Kritiken elo vun den Arrëten. Dat heescht, ech envisagéieren, deem zrëckzezéien, verschidden Elementer awer ze iwwerhuelen aus deem Arrêt, déi mer kënnen loossen, wéi zum Beispill, dass de Seuil de peine duerch eng Liste d'infractions ersat gëtt, d'Obligatioun vum Effacement irrémédiable vun den Donnéeën nom Délai de conservation an och nach dat, wat Der ugeschwat hutt, eeben d'Obligatioun, fir d'Donnéeën op europäeschem Territoire ze halen.

Am Resümmee: Ech sinn der Meenung, mir sinn hei absolutt an der Pflicht, mir mussen hei legiferéieren. Mir kënnen net op eng europäesch Léisung waarden, well et net ka sinn, dass mer nach ëmmer on-differenziéiert déi Date sammeln. A mir sinn net nëmmen an der Pflicht, well et eng Rechtssprechung vum Europäesche Gerichtshaff ass. Mir sinn och an der Pflicht, well et eng Fro vu Rechtssécherheet ass vun den Affären. Well Dir kënnst lech jo virstellen, dass dat doten och kann invoquéiert gi viru Gericht par rapport zu Donnéeën, déi gesammelt goufen, déi net konform wäeren zum Esprit vun den europäeschen Arrëten. A fir dass mer effikass

kënnen weider d'Enquêtë maachen an dass déi net baséieren op Informatiounen, déi eigentlech net hätten dierfe gesammelt ginn, do si mer gefuerdert, hei ze handelen. Mir mussen elo nach d'Detailanalyse maachen, wéi mer dat do konkret kënnen a Musek ëmsetzen, well sech awer eng Rei praktesch Froe stellen.

Mir brauchen zwou verschidde Prozeduren, déi eng kloer méi fir den Droit commun an dat anert eebe fir alles, wat den SRE ubelaangt. A voilà! Déi Diskussiounen sinn en cours a soubal ech do eppes hunn, wat sprochräif ass, wäert ech natierlech dermat an d'Chamberskommissioun kommen.

Merci.

■ **M. Fernand Etgen, Président.** - Merci villmools der Madamm Justizministesche Sam Tanson.

9. 7270 - Projet de loi portant approbation de la Convention sur l'immatriculation des objets lancés dans l'espace extra-atmosphérique, adoptée par l'Assemblée générale des Nations Unies, faite à New York, le 12 novembre 1974

7317 - Projet de loi portant sur les activités spatiales et modifiant :

1° la loi modifiée du 9 juillet 1937 sur l'impôt sur les assurances dite « **Versicherungssteuergesetz** » ;

2° la loi modifiée du 4 décembre 1967 concernant l'impôt sur le revenu

Mir kommen elo zum Projet de loi 7270 an zum Projet de loi 7317 iwwert d'Aktivitéiten am Weltraum. Mir diskutéieren déi zwee Projeten zesummen. An déi gemeinsam Riedezäit ass nom Modell 1 festgeluecht. An ech géif dem Rapporteur, dem Här Claude Haagen, d'Wuert ginn als Rapporteur vun deenen zwee Projet-de-loien. Här Haagen, Dir hutt d'Wuert.

Rapports de la Commission de l'Économie, de la Protection des consommateurs et de l'Espace

■ **M. Claude Haagen (LSAP), rapporteur.** - Merci. Léif Kolleeginnen a Kolleegen, esou, wéi de President et scho gesot huet, wäert ech déi zwee Gesetzesprojeten 7270 an 7317 zesumme virstellen, well se natierlech mateneen ze dinn hunn. Mir wäerten herno, esou, wéi dat üblech ass, awer och getrennt doriwwer ofstëmmen.

De Gesetzesprojet 7270 betrëfft d'Unhuele vun der Konventioun vun New York vum 12. November 1974 iwwert d'Umelle vun Objeten am Espace extra-atmosphérique, also ausserhalb der Äerdatmosphär, an de Gesetzesprojet 7317, dee vun de Weltraumaktivitéiten an den domadder verbundene juristeschen, finanzielle Versécherungs- a Geneemegungskonditiounen a -prozeduren handelt.

Här President, zanter dem Lancement vum Satellitt Astra 1A am Dezember 1988 ass Lëtzebuerg aktiv engagéiert am Weltraumsektor. Am Joer 2005 ass Lëtzebuerg der Europäescher Weltraumagence ESA bäigetrueen. Dëse Sektour mécht am Moment dann och 500 héich qualifizéiert Aarbechtsplazen a bal 4 % vun eisem PIB aus, den héchsten Taux fir dës ekonomesch Aktivitéit an der ganzer EU.

Am Weltraum ginn et momentan ongeféier 5.500 Satellitten, déi sech op dräi verschidden Orbitte verdeelen. Nëmmen d'Hallschent, also eng 2.700 Satellitten, si momentan operationell. Dës wirtschaftlech Aktivitéit sinn encadréiert vu verschiddenen internationalen Accorden, notament dem Traité de l'espace, deem Lëtzebuerg 2005 bäigetrueen ass, an d'Convention sur la responsabilité, zu där sech Lëtzebuerg zanter 1983 bekannt huet.

Aus deenen zwee Accorden ergëtt sech, dass Lëtzebuerg, wéi aner Länner, och d'Privatacturen engem Autorisations- an Iwwerwaachungsmechanismus ënnerzéie muss. Et ass schliisslech esou, dass Lëtzebuerg d'Verantwortung, d'Responsabilitéit droe muss, wann et zu Schied kënnst a Relatioun mat engem Objet spatial, wou Lëtzebuerg den État de lancement ass.

Et verwonnert deemno och net, dass ëmmer méi Staate sech eng national Legislatioun ginn zu de kommerziellen Aktivitéiten vun hire privaten Operateuren am All. Notament d'UNO-Resolutioun 68/74 portant, an ech zitieren, « recommandations sur les législations nationales relatives à l'exploration et à l'utilisation pacifiques de l'espace extra-atmosphérique » vum 11. Dezember 2013 huet d'Staaten dozou opgeruff, eng national Legislatioun ze adoptéieren, déi an engens den Obligatiounen aus den internationalen Traitéen soll a muss Rechnung droen.

Wann een déi aktuell gesetzlech Basis am Lëtzeburger Land kuckt fir déi kommerziell Weltraumaktivitéiten a se liest - an der Essenz ass dat den Artikel 20 aus dem Gesetz vum 27. Juli 1991 iwwert d'elektronesch Medien -, da mierkt ee relativ séier, dass et néideg war, eis Gesetzgebung op de Leescht ze huelen. Dësen Artikel beseet notament: « Nul ne peut établir et exploiter un système

de satellites luxembourgeois, sans avoir obtenu préalablement une concession, accordée par le Gouvernement, sur proposition conjointe du ministre ayant dans ses attributions les télécommunications et du ministre ayant dans ses attributions les médias. » Dat Gesetz ass kloer gemënt gewiescht op Zäiten, wou sech d'Weltraumaktivitéiten op d'Transmissioun vun Radios- an Televisiounsprogrammer begrenzt hunn.

De gréisste Problem bei der aktueller gesetzlecher Basis ass awer sécher, dass d'Concessioun, déi de Lëtzeburger Staat dem Gesetz no engem privaten Operateur ka ginn, nëmmen dann zum Droie kënnst, wann de Concessionnaire Lëtzeburger Frequenzen notzt. Et kéint deemno virkommen, dass en Operateur zwar vu Lëtzebuerg aus seng Aktivitéit bedreift, mee total ënnert dem Radar vun enger Regulatioun vusäit vum Grand-Duché bleift, well en d'Frequenze vun engem anere Staat benotzt. Dës Situatioun ass net gesond an net zäitgemëss an dofir ass et natierlech och wichteg a richtig, dass mer an dësem Fall als Legislateur handelen.

Am Laf vun der Zäit hu sech d'Aktivitéiten vun den Operateuren am Weltraumsektor diversifizéiert. Et geet net méi just ëm d'Transmissiounsservicer bei audiovisuelle Medien, mee och ëm d'Transmissioun vun Donnéeën tëschent Entreprises, ëm den Accès zum Internet, virun allem a schlecht vernetzte Géigenden, oder och nach ëm Navigatiounsservicer.

En moyenne gräift schonn haut een Utilisateur vun engem Smartphone duerchschnëttlech op 40 verschidde Satellitten an engem Dag zrëck - an d'Tendenz weist kloer no uewen.

Dës Diversifikatioun vun den Aktivitéiten am Weltraumsektor fënnt natierlech net nëmme ronderëm eis statt, mee och zu Lëtzebuerg selwer. De Lëtzeburger Weltraumsektor diversifizéiert sech an et implantéiere sech nei Acteuren, déi sech net op d'Transmission vun Televisiounsprogrammer spezialiséieren, mee zum Beispill op d'Exploitatioun vu Ressourcen am All. Hei hu mir, wéi Dir alleguerte wësst, en entspriechend Gesetz. An den Artikel haut an de Medien iwwer ispace ass dat bescht an och dat aktuellst Beispill derfir.

Doriwwer eraus denken ech zum Beispill un d'Kollekt vun aneren Aktivitéiten, un Observationsdonnéeën vun der Äerd, un d'Exploratioun vum Weltraum an och u Servicer fir Satellitten am Orbit ze reparéieren oder ze betanken. Ech hat jo virdru gesot, dass d'Hallschent vun de Satellitten actuellement am Orbit net méi operationell sinn. Do erkennt Der also ganz einfach, wéi vill Potenzial an der leschtgenannter Aktivitéit, der Reparatioun an dem Reapvisionnement, stécht.

E ganz wichteg Beispill, wat Satellitte kënnen méiglech maachen, ass och d'Initiativ vun der Regierung emergency.lu Dobäi geet et ëm en duerch Satellitten ënnerstëtzte Kommunikatiounssystem, deem am Fall vun Naturkatastrophen oder humanitäre Missiounen eng rapid Kommunikatioun weltwäit erméiglecht, notament, fir dass d'Protection civile um Terrain ka beschtméiglech hëllefen.

En vue vun der Diversifikatioun vun de Weltraumaktivitéiten ass et wichteg, en Autorisationsregimm ze schafen, dee méi ëmfaassend gëtt, wéi dat bis elo de Fall war. Mat dësem Gesetzesprojet 7317 brénge mir et fäerdeg, en Autorisationsregimm anzeféieren, deem all Situatiounen couvriert, an deenen d'Responsabilitéit vum Lëtzeburger Staat kéint engagéiert ginn.

Et gëtt eng gesetzlech Basis agefouert, fir kommerziell Aktivitéiten am All ze autoriséieren an ze kontrolléieren duerch Lëtzeburger Autoritéiten, fir se net ze autoriséieren, wa se net de Kritären entsprechen, respektiv fir am Fall, wou Aktivitéiten hir Autorisatioun entzu kritt hunn, all Mesuren ze huelen am Sënn vun der Sécherheet vu Mënsch an Ëmwelt.

D'Krittäre fir d'Autorisatioun sinn am Artikel 6 festgehalen. Den Operateur muss notament nowise kënnen, dass seng Administration centrale a säi Siège statutaire am Grand-Duché sinn. Doriwwer eraus muss en och en zollienen Dispositif um finanziellen, techneschen a juristeschen Niveau virweise kënnen. Och d'Exigenz vun enger seriéier interner Gouvernance mat enger klorer Struktur a Verdeelung vun der Responsabilitéit ass zrëckbehalte ginn.

D'Membere vun der Direktioun mussen déi néideg Honorabilitéit, Kompetenz an Experience en lien mat hire jeeeweilegen Attributiounen beleed kënnen. D'Identitéit vun allen Associéien an Aktionären, déi eng qualifizéiert Participatioun hunn, muss dem Minister matgedeelt ginn.

Bei all Demande d'autorisation muss eng detailéiert Analys vun de Risike vun der kommerzieller Weltraumaktivitéit bäigeleucht ginn an och d'Couverture vun deene beschriwwene Risiken, sief et duerch eng Assurance oder duerch finanziell Eegemëttel, kloer an der Demande beschriwwen ginn.

Finalement ass am Artikel 6 och nach d'Obligatioun verankert, d'Kontabilitéit all Joer duerch e Réviseur d'entreprises kontrolléieren ze loossen.



Den Artikel 7 gesäit doriwwer eraus nach vir, datt d'Demande d'autorisation vun engem Programme d'activité ergänzt gëtt.

D'Autorisation an d'Iwwerwaachung vun de Welt-raumaktivitéite brauchen d'Mise en place vun enger ëffentlecher Instanz, déi déi néideg Mëttele kritt, fir effektiv d'Demanden ze examinéieren, d'Autorisationen ze preparéieren an de Respekt vun de legalen Obligatiounen ze iwwerwaachen.

An enger éischter Phas ass virgesinn, datt mer sollen op d'Expérience vum Service des médias et des communications a vum Commissariat du Gouvernement bei der SES Astra zréckgräifen. Dëse Service muss deementsprechend och déi néideg Leit zur Verfügung gestallt kréien.

Dir Dammen an Dir Hären, dëse Gesetzesprojekt schreift sech an eng logesch Suite a mat dem Gesetz vum 20. Juli 2017 iwwert d'Exploitation an d'Utilisation vun de Ressourcen am Weltraum. De Champ d'application vun dësem Gesetzesprojekt ass awer vill méi breet wéi dee vum Gesetz vum 20. Juli 2017. De Champ d'application vun dësem Gesetzesprojekt begräift all Aktivitéite vum Weltraum-sektor an, fir déi de Lëtzebuerger Staat internationalen Accorden no responsabel ass, ausser den Aktivitéiten, déi schonn am Gesetz vum 20. Juli 2017 couvriert sinn.

Hei nach e Wuert zum Avis vum Staatsrot bei deem dote Projet de loi, deem seng Opposition-formellen an e puer grouss Kategorië kënnen resümiert ginn. D'Opposition-formellen hu sech haaptsächlech op Widderspréch am Gesetzesprojekt zu de constitutionnelle Prinzippe vum Liberté du commerce, op juristesche Onsécherheeten a Widderspréch zu internationale Verflüchtung baséiert. Deenen ass d'Kommissionen nokomm.

Här President, am zweete Gesetzesprojekt 7270 aprouvéiere mir d'Convention iwwert d'„immatriculation des objets lancés dans l'espace extra-atmosphérique“, déi de 14. Januar 1975 (veuillez lire: den 12. November 1974) zu New York ënnerschrifft ginn ass.

D'Convention gesäit vir, datt d'Staate sech en nationale Regëster vun den Objet-spatiale ginn. Dësen zweete Gesetzesprojekt, an dat hunn ech scho gesot, ass ganz enk mat deem éischte verbonnen an e gëtt eis d'Méiglechkeet, en nationale Regëster vun den Objets spatiaux ze schafen als logesch Konsequenz zur Adhesioun vu Lëtzebuerg zu der Konvention vum 1975.

Den nationale Regëster ass ëffentlech an all Operateur muss deem zoustänneg Minister all Indicationen matdeelen, déi d'Identifikation vum Objet spatial erméiglechen, grad wéi den Datum an déi geografesch Plaz vum Lancement. Bei all Change-ment vun de Parametere vun engem Objet spatial muss de Minister natierlech informéiert ginn.

Déi privat Acteure vun der Lëtzebuerger Économie hunn haut schonn eng gewëssen Zuel vu Satellitten an den All lancéiert. D'SES Astra huet beispillsweis 18 Satellitten op véier verschidde Lëtzebuerger orbitale Statiounen.

Lëtzebuerg huet déi Objets spatiaux dem Bureau des affaires spatiales vun de Vereenten Natiounen op Basis vun der Resolution Nummer 1721 B vum 20. Dezember 1961 notifiéiert.

Well d'Gesetz vum 20. Juli 2017 nach net d'Inscription vun den Objets spatiaux am Kader vun der Exploration an d'Utilisation vun de Weltraum-ressource virgesinn hat, wäert sech dësen zweete Gesetzesprojekt op wirklech alleguerten d'Aktivitéiten am Zesummenhang mam All erstrecken.

Och wann d'Aktivitéiten am Weltraum vläicht e bëssen abstrakt wirken, sou däerfe mer eis awer net dësen Opportunitéite verschléissen. Virun allem awer, wa mer eng diversifizéiert Wirtschaft hei am Land bedreiwe wëllen, da muss eis Gesetzgebung och mat der Zäit Schratt halen, sief et am Weltraumsektor oder an anere weidere Secteuren.

Zum Schluss wëll ech nach soen, datt de Projet de loi 7317 misst en vigueur sinn, ier d'Convention vum Projet de loi 7270 ratifizéiert gëtt. Fir weider Detailler an notament d'Avis vun deene verschidde Kummere verweisen ech op mäi schrëftleche Rapport a bidden lech, dës wichteg zukunftsorientéiert Gesetzesprojete fir d'Lëtzebuerger Économie ze stëmmen.

Dat gesot, ginn ech och heimadder den Avis positif vun der LSAP-Fraktioun. Merci.

■ **M. Fernand Etgen, *Président*.** - Merci villmools dem Rapporteur Claude Haagen. An als éischte Riedner ass den honorabelen Här Laurent Mosar age-droen. Här Mosar, Dir hutt d'Wuert.

Discussion générale

■ **M. Laurent Mosar (CSV).** - Här President, Här Minister, léif Kolleeginnen a Kolleegen, ufänke wëll ech mat engem grousser Merci un eise Président-rapporteur, deen eis eng ganz komplex technesch Matière awer a relativ einfache Wieder erkläert huet, och nach eng kéier op d'Wichtigkeet vun

deem Projet higewisen huet, soudatt ech eigentlech net ganz vill brauch nach derbäizesoen.

Ech wëll awer direkt virausschécken, datt meng Fraktioun och dëse Projet wäert stëmmen. Ech wollt awer vläicht déi eng oder aner Remark zu dësen zwee Projekte maachen, déi mer awer wichteg schéngen ze sinn. Et ass scho virduen ugeklongen: U sech baséiert dëse Projet op - fir d'éischt - dem Traité vum Espace vun 1967 an dann op enger internationaler Konvention iwwert d'Responsabilitéit, d'Haf-tung fir Schied, déi am Weltall provozéiert ginn, an e schaaft eigentlech hei generell e legale Kader.

Ech wëll awer nach eng kéier drop hiweisen, well ech gesinn, et ass elo kee ganz groussen Andrang de Mëtten hei am Plenum.

■ **M. André Bauler (DP).** - Mir sinn hei, Här Mosar.

■ **M. Laurent Mosar (CSV).** - Hei geet et trotzdem ëm eppes Substantielles, well et geet notament ëm d'Responsabilitéit vum Lëtzebuerger Staat. An Dir braucht lech näischt hei virzemaachen! Wann do wirklech eng kéier géif en Accident am Weltall geschéien duerch Aktivitéite vun enger Firma, brauch ech lech net ze soen, ëm wat et do finalement géif goen. An duerfir, mengen ech, ass dëse Projet wichteg.

Am Ursprongsprojekt ware jo do e bësselchen aner Dispositionen virgesinn an do war jo eigentlech och e bëssleche virgesinn, datt d'Responsabilitéit vum Staat sollt e bësselchen ofgeschwächt ginn. Do war de Staatsrot awer aus verständleche Grënn net der-mat d'accord. En huet dat och gutt argumentéiert a mir sinn dann eigentlech elo erëm beim Droit commun, dat heescht bei enger genereller Responsabilitéit, déi de Staat huet fir alles, wat do geschitt, a fir all déi Firmen, déi hei zu Lëtzebuerg an deem doten Domaine d'activité aktiv sinn.

Do kann et also wirklech ëm ganz villes goen. Ech mengen awer, an duerfir si mir och d'accord mat där Demarche vun der Regierung, datt mer hei keen anere Choix haten, wéi op deen dote Wee ze goen.

Dat seet eis awer och, an da sinn ech bei menger zweeter Remark, wéi wichteg datt et hei ass, datt déi Firmen, déi sech hei niderloossen, awer och wirklech duerchlicht ginn, duerchlicht gi fir d'éischt iwwert d'Kapital, wat se matbréngen, och duerchlicht gi ganz genau iwwer hir Aktivitéiten, déi si hei wëllen developpéieren, och e bësselchen iwwer hir Aktionären, déi do hannendrustinn. Well ech mengen, dat, wat mer net wëllen, an ech huelen un, datt den Här Minister dat d'selwecht gesäit, ass, datt mir elo iergendwéi hei géifen esou e Standuert ginn, wou allméiglech Firma géifen hei op Lëtzebuerg kommen, wou dann herno d'Gesamtresponsabilitéit dovunner géif um lëtzebuergesche Staat leien, wat, ech mengen, net ouni Gefor wär.

An duerfir, wéi gesot, sinn ech bei mengem zweete Punkt, ass et wichteg, datt mer wirklech hei ganz genau kucken, wien hei bei eis kënn. An déi ganz Procédure d'autorisation, déi jo elo hei genau beschriwwen ass, déi muss wirklech respektéiert ginn.

An ech géif och wirklech nach eng kéier op déi Étude d'impact hiweisen, déi fir déi Aktivitéiten do muss gemaach ginn.

An dann an e Punkt, dee vläicht net dee mannst wichtige Punkt ass, datt ass deen: Mir musse wirklech och kontrolléieren, wéi et mat den Assurancen ass, déi déi dote Firmen hei wäerte maachen, well, souguer wann de Staat natierlech de par le droit commun responsabel ass, behält en natierlech ëmmer en Droit, fir sech vis-à-vis herno vum Operateur ze retournéieren. An duerfir mengen ech, ass et wichteg, datt mer och sécher sinn, datt all déi Entreprises herno wirklech zolidd Police-d'assurancen hunn.

Ech wollt dann och vun der Geleeënheet profitéieren, Här Minister, fir vläicht vun lech e kuerzen Zwëschbilan ze kréien: Wou si mer eigentlech do drun? Wéi vill där Entreprisë sinn eventuell schonn an de Startlächer, fir och an esou eng Demande d'autorisation do eranzekommen? Ech mengen, dat wär net oninteressant ze wëssen.

Ech géif och wirklech hei derfir plädéieren, datt d'Chamber an déi derfir zoustänneg Kommission méiglechst enk agebonne géif ginn och an déi ganz Prozeduren, datt mer och reegelméisseg do géifen e Bilan gemaach kréien, wéi vill där Sociéiteiten datt mer hunn, a wat fir engem Kontext déi och wäerten aktiv sinn, wéi vill Leit datt se eventuell och hei beschäftegen. Ech mengen, dat wär schonn eng sënnavoll Aufgab. An duerfir, wéi gesot, wär ech frou, wann den Här Minister mer nach herno kéint e puer zousätzlech Informatiounen do ginn.

Ech kommen dann och schonn zum Schluss. Ech wollt awer och do nach eng kéier drop hiweisen, datt jo dat eent Gesetz, deen éischte Projet, dee mir hei stëmmen, jo och e bësslechen op d'SES ausge-riicht ass. Duerfir ass dat och e wichteg Gesetz. An ech wollt do nach eng kéier awer op déi Situation vun der SES agoen.

Ech hat lech schonn d'lescht kéier, Här Wirtschafts-minister, déi Froe gestallt. Do hat Der gesot, Dir

géift lech nach informéieren. Do ware relativ vill Diskussiounen, datt d'Aktivitéite vun der SES géifen opgespléckt ginn, datt eventuell en Deel vun den Aktivitéite sech an den USA géif ofspillen.

Dat schéngt awer elo net méi esou ze sinn. Ech mengen, et wär wirklech interessant, och vun lech ze héieren, wou d'SES wëllt histeieren. Et ass trotzdem nach ëmmer eng vun deene ganz, ganz wichtigen Entreprisë vun dësem Land. Wann Der dat de Mëtten net kënn oder net wëllt maachen, kënnen mer dat bien entduen awer och eng kéier an enger Kommissionssitzung maachen, well ech mengen, et ass och wichteg, datt mer awer wëssen, a wat fir eng Richtung och eng SES sech wäert dirigéieren.

Dat gesot, soen ech scho Merci fir déi vill Äntwer-ten, déi Der mer wäert ginn. An ech bréngen, wéi gesot, nach eng kéier den Accord vu menger Frak-tioun zu dësem Projet de loi.

Merci.

■ **Plusieurs voix.** - Très bien!

■ **M. Fernand Etgen, *Président*.** - Merci villmools, Här Mosar. Nächsten ageschriwwene Riedner ass den honorabelen Här Guy Arendt. Här Arendt, Dir hutt d'Wuert.

■ **M. Guy Arendt (DP).** - Merci, Här President. Léif Kolleeginnen a Kolleegen, fir d'éischt géif ech dem Rapporteur Merci soe fir seng detailléiert Explika-tiounen iwwert dës zwee Gesetzesprojeten. Duerfir wëll ech och elo ... De Rapport war esou detail-léiert, datt ech net méi op all déi Detailler wëll a muss agoen.

Am Juli 2017 gouf hei an der Chamber dat éischt Space-mining-Gesetz gestëmmt a Lëtzebuerg huet domadder eng Virreiderroll iwwerholl, andeems et iwwert d'Gewënnung vu Ressourcen am Weltall le-giferéiert huet. Haut wäerte mer zwee weider Ge-setzer stëmmen, déi eis e generelle legale Kader ginn, déi d'Aktivitéite vun Entreprises am Weltall re-guléieren, déi vu Lëtzebuerg aus gesteeiert ginn. A mir hu scho verschidden Explikatiounen vun de Vir-riedner derzou kritt.

Heibäi geet et besonnesch ëm d'Responsabilitéit vu Lëtzebuerg um internationale Plang, wann esou eng Entreprise Aktivitéiten am Weltall tätegt, an éier en Ongléck passéiere géif. Duerfir ass et wichteg, datt d'Entreprisë sech u kloer Reegelen halen. Dës zwee Gesetzter wäerten also d'Kritikäre bestëmmen, wéi een eng Autorisation vu Lëtzebuerg kritt, fir Akti-vitéiten am Weltall kënnen ze maachen, an déi kloer festhalen, u wat ee sech alles muss halen.

Donieft gëtt d'Iwwerwaachung vun den Aktivitéiten definéiert an d'Immatriculation vun den Objeten, déi an de Weltall geschoss ginn, muss kloer an engem nationale Regëster festgehal ginn.

Här President, virewech: D'DP ënnerstëtzt dës wei-dere legislative Schrëtt, fir e Kader ze schafen, dee Lëtzebuerg attraktiv wäert maache fir Entreprises, déi Aktivitéiten am Zesummenhang mam Weltall hunn.

Mee wéi bei all Entreprises, déi sech an engem Land wëllen niderloossen, muss de Kader stëm-men an d'administrativ Hürden dierfen net ze héich sinn an discouragéierend wirken. Ech wëll hei net méi un Entreprises erënneren, déi Lëtzebuerg de Réck gedréint hunn, well eis Prozedure fir si - zu Recht oder zu Onrecht - ze laangwierig waren.

Wann een de Projet de loi iwwert d'Aktivitéiten am Weltall liest, huet een a première vue och d'Gefill, datt den administrativen Opwand ganz héich ass. Natierlech wëlle mir mat alle Mëttele vermeiden, datt eppes aus dem All eroffält. A falls esou eng Katastroph wirklech eng kéier sollt antrieden, wëlle mir selbstverständlech, datt d'Fro vun der Responsabilitéit a vun der Assurance kloer gekläert ass.

Et dierf awer net zu enger Multiplikation vun admi-nistrativen Autorisationen kommen, déi Entreprisë kéinten derzou beweegen, sech awer enzwousch anescht niderzeloossen. Den zoustänneg Minis-ter huet eis an enger Kommissionssëtzung garan-téiert, datt an der Praxis déi Entreprises, déi hei a Fro kommen, fir en Dossier d'autorisation anzeree-chen, zentraliséiert vun der Luxembourg Space Agency begleet a berode wäerte ginn. Dës Agence wäert hiren eenzegen Uspriechpartner sinn an esou kommen all d'Prozedure bei hir zesummen.

Här President, d'DP steet fir einfach Prozeduren, kuerz Delaien an dofir, datt näischt sollt gefrot ginn, wat net onbedéngt noutwendeg ass. Mir hoffen, datt d'Demanden, déi am Kader vun dësem Gesetz wäerten agereecht ginn, séier traitéiert ginn an den Dialog tëschent dem Demandeur an der Agence op-timal verlafte wäert.

Mir gesinn et effektiv positiv, datt mir fir esou e spezifesche Sektor wéi de Space eng speziell Agence hunn, wou Leit schaffen, déi deen néidegen Knowhow an deem Domän hunn, fir als idealen an eenzegen Uspriechpartner fir de Staat kënnen ze fungéieren. An anere Beräicher ass dat leider net de Fall. Mee wat nach net ass, ka jo nach ëmmer kommen.

Här President, de Spacebusiness ass dee rezent-sten Effort, fir eis Économie weider ze diversifizéieren. Ech hat et am Kader vun enger Aktualitéits-stonn hei schonns gesot: Bei laangfristige Projekte gesäit een d'Resultat dacks eréischt Jore méi spéit, mee et sinn déi Projeten, déi herno an de Ge-schichtsbücher ernimmt ginn.

Den Tom Hillenbrand, ënner anerem Auteur vu Kri-mien, déi sech hei zu Lëtzebuerg ofspillen, an awer och vu Science-Fiction-Romaner wéi „Hologramma-tica“ a „Qube“, gleeft op alle Fall drun. A senge Ro-maner, déi am Joer 2091 spillen, huet e Lëtzebuer-ger, genannt de „Kieselkönig“, als Éischten erkannt, datt een Edelmetaller tëschent Mars a Jupiter kann ofbauen. Och wann dat elo Fiktioun ass, sou beweist et awer, datt Lëtzebuerg esouguer an der auslännescher Literatur als e potenzielle Player an deem Secteur ugesi gëtt.

Aktivitéiten am Weltall kléngen effektiv futuris-tesch. Et ass eeben e Sektor, deen nach an de Kannerschong stécht a wou een, wann iwwerhaapt, d'Resultater net muer oder iwwermuer, mee eréischt an 20, 30 oder 50 Jore wäert gesinn. Jo, Lëtzebuerg huet d'Potenzial vun deem Sektor fréi erkannt. An doriwwer sollt mer all frou sinn. D'DP ass och dovunner iwwerzeegt, datt et wichteg ass, sech fréizäiteg dee richtige Kader ze ginn an esou Lëtzebuerg bei esou engem Zukunftsprojekt op d'Weltkaart ze setzen.

Mir legiferéieren haut och, fir vum sougenannte First Mover Advantage ze profitéieren. Jo, de Wël-len ass do, fir First Mover ze sinn, sou wéi dat an den 80er-Jore bei der Fongenindustrie och de Fall war. Wien hätt deemools geduecht, datt dat klengt Lëtzebuerg déi éischt Fongenindustrie op der Welt no Amerika géif gi respektiv déi éischt Fongen-industrie an Europa?

Lëtzebuerg huet scho méi wéi eng kéier gewosst, wéi een duerch proaktiv Handel seng Économie diversifiéieren oder souguer e ganz neit Standbeen opbaue kann. Ech denken do awer och un d'Stol-industrie, déi den Ursprung vun eise Rächtrum war, an natierlech och un eis Finanzplaz.

Ech denken awer och un d'Success-Story vun RTL, wou mir Virreider am Verdeele vu Radiosfrequenze waren. A wann een un de Weltall denkt, an et ass och schonn erwäant ginn, denkt ee selbstver-ständlech och un d'SES. Änlech wéi bei de Space-Ressources-Projete gouf de Projet SES vun esou Munchem als onrealistesche Iddi duergestallt.

Et muss ee wëssen, datt de Staat deemools eng Garantie gestallt huet, déi 5 % vum Staatsbudget ausgemach huet. Et war e risiköräiche Projet. Et gouf gefaart, datt d'Satellitten eroffale kéinten an e grousser Schued géifen urrichten. Haut, iwwer e Véierelsjoerhonnert méi spéit, ass den SES-Projet eng vu villen Erfollegsgeschichten, déi och ni dierfe feelen, wann een de Standuert Lëtzebuerg wëllt an d'Vitrinn stellen.

Här President, d'Aktivitéiten am Weltall wäerten an Zukunft och weider Investissementer an Knowhow an d'Land bréngen, wat jo och d'Zil vun enger diver-sifiéierter Standuertpolitik ass. Et kann een och do-vunner ausgoen, datt déi Entreprisë mat hiren Akti-vitéiten ouni Problemer an d'Bild vun enger nohalte-ger Wirtschaftspolitik passen.

De Sektor spatial ass e Laangzäitprojekt, däers ass sech och d'Regierung bewosst. Ech hu mer soe ge-looss, datt sech bis dato scho méi wéi 20 Entrepri-sen aus deem Beräich zu Lëtzebuerg niddergeloooss hunn. Weider Headquartere wäerten derbäikommen an et geet een dovunner aus, datt ronn 60 Entrepri-sen à moyen terme op Lëtzebuerg wëlle kommen.

Et ass vun Honnerte Méiglechkeete geschwat ginn, déi sech am Space erginn, dorënner ënner anerem och d'Optanke vu Satellitten am Weltall, de souge-nannte „Refueling“. Da gëtt et och nach d'Méiglech-keet, fir aus dem Weltall Analysen an Observatiou-nen ze maachen, déi a ganz ënnerschiddlechen Do-mäne kënnen benotzt ginn.

Zum Schluss wëll ech nach mäi Kolleeg, den André Bauler, zitéieren, deen a senger Ried zum Kaderge-setz fir de Space Mining hei an der Chamber sot, an ech zitéieren: „Mir sollen de Courage hunn, fir no de Stären ze gräifen, ma nëmmen, wa mer mat zwee Feiss um Buedem bleiwen!“

■ **Plusieurs voix.** - Très bien!

■ **M. Guy Arendt (DP).** - Dëst gesot, wëll ech den Accord vun der Demokratescher Partei zu dësen zwee Projekte ginn an lech alleguerte Merci soe fir d'Nolauschtenen.

■ **Plusieurs voix.** - Très bien!

■ **M. Fernand Etgen, *Président*.** - An ech soen dem Här Guy Arendt villmools Merci a ginn d'Wuert wei-der un déi honorabel Madamm Semiray Ahmedova. Madamm Ahmedova, Dir hutt d'Wuert.

■ **Mme Semiray Ahmedova (déi gréng).** - Här President, Här Minister, léif Kolleeginnen a Kolle-egen, fir d'alleréischt e grousser Merci un de Rappor-ter, den honorabelen Här Haagen, fir de schrëftle-chen an och de mündleche Rapport. Bei dësem

Gesetz 7270 ratifiziert Lëtzebuerg d'UNO-Konvention vum 12. November 1974 iwwert d'Immatrikulatioun vun Objeten, déi an de Weltraum, de sougenannten „Espace extra-atmosphérique“, geschéckt ginn.

De Gesetzesprojet 7317 erlaabt eis et, am Kader vun der Konvention och zu Lëtzebuerg esou eng Immatrikulatioun duerchzeféieren. Bis elo ass dat iwwert den Artikel 20 vum Gesetz vum 27. Juni 1996 (veuillez lire: 27. Juli 1991) gereegelt ginn. Dës Prozedur staamt awer aus enger Zäit, wou et haaptsächlech ëm d'Satelliten vum der SES gaangen ass, déi fir d'Iwwerdroung vun audiovisuelle Signaler an den Orbit bruecht goufen.

Haut ginn d'Satelliten awer och fir d'Navigatioun, d'Iwwerdroung vun Donnéeën zwëschen Entrepreneuren oder als Accès zum Internet agesat. Doriwwer eraus sti mer och am Ufank vun engem neie Weltraumzäitalter. Eng Rei Entrepreneuren, awer och Staate bréngen sech a Positioun, fir an der Zukunft Ressourcen am Weltall ofzebauen. An och d'Erfuerschung vum Weltall an d'Fuerschung am Weltall ginn ëmmer méi wichteg.

Mat deenen zwee Gesetzesprojete vun haut positionéiert sech Lëtzebuerg an dëser neier Course ëm de Weltraum. Dëst geschitt awer och ënner méi engem groussen Kader vun de Space Ressources, déi och eng aner Initiativ an deem Kontext sinn.

De Rapporteur ass a sengem mëndlechen a schrëftleche Rapport schonn ausféierlech op déi zwee Gesetzesprojeten agaangen. Dofir wëll ech vun der Geleeënheet profitéieren, fir e puer méi grondsätzlech Froen opzuerwerfen. Et schéngt nach wéi Zukunftsmusek, fir kënnen enges Daags Rostoff am Weltall ofzebauen. Mat dësem Gesetzesprojet maache mir e wichtige Schratt um Wee an dës Zukunft.

Als Gréng gi mir mat vill Virwëtzt, awer net onkritesch un d'Fro vum Ofbau vun de Ressourcen am Weltall erun. Wann een d'Fro vum Space Mining oder anere Weltraumtechnologie stellt, da stellt een automatesch déi Fro no der Zukunft vun der Mënschheet a vun hei doheem, vun eiser Heemecht. Et gi verschidde Visionäre, déi dovunner dreemen, nach zu Liefzäiten dës Planéit an domadder all seng Probleemer hannernt sech ze loosseren.

Fir eis ass kloer, dass een de Weltraum net géint eise Planéit ausspülen däerf. Mir därfen eis net där Illusioun higninn, dass den Ofbau vun de Ressourcen am Weltraum erlabe géif, eis Hausaufgaben a puncto nohaltege Entwécklung oder Klimaschutz hei ënnen ze schwänzen. Ëmgedréint géilt awer och, dass een e grouse Feeler géif maachen, wann een de Bléck net erop richte an quasi wuertwäertlech no de Stäre géif gräifen.

Mir hunn hei zu Lëtzebuerg gutt Ramebedingungen, fir och kënnen no de Stären ze gräifen: de besteeënden Knowhow mat der SES, Sue mat der Finanzplatz, Fuerschung vun der Uni Lëtzebuerg awer och anere Fuerschungsinstitute, Kompetenzen am Weltraumrecht, eng zimmlech gutt entwéckelt Startupkultur, déi am Fong d'Fuerschung kann a Realitéit ëmsetzen, héich spezialiséiert Produktionssitten a Politiker, déi sech och eppes trauen.

Bei der Erschleissung vum Weltraum a senger Erfuerschung handelt et sech natierlech ëm eng laangfristeg Visioun. Mee als Gréng si mir jo d'Partei, déi technologesche Fortschritt priedegt, fir eis Ëmwelt ze retten. Mir sinn d'Partei, déi eise Kanner wëllt eng liewenswäert Welt hannerloossen.

(Brouhaha)

Da si mer eis jo all eens.

Haut schonn un déi nächst Generatiounen denken, net nëmmen déi nächst, mee och déi iwwernächst, déi 100, déi 1.000 duerno. Wann dat keng gréng Visioun ass, déi eng positiv Visioun ass?

Mir dierfen awer och net naiv un dat Theema erugehen. Et ginn hei duerchaus eng Rei vu Konfliktfelder. Et ass jo net esou, wéi wa verschidde konkurrierend Staate sech dann op eemol bei der Fro no der Erschleissung vum Weltall géife verdroen. Fir eis als Gréng ass et wichteg, dass mir all Initiativ stäerken, fir multilateral Léisungen ze fannen. Mir mussen alles maachen, wat an eiser Kraaft steet, fir dass de Weltall net d'Schauplatz vun neie Konflikter gëtt. Dofir ass et och wichteg, haut der ratifizierter Konvention vum 1974 bäizetrieden.

Dat gesot, ginn ech och den Accord vun der grénger Fraktioun zu deenen zwee Gesetzesprojeten a soen och Merci fir d'Nolauschteren.

■ **Une voix.** - Très bien!

■ **M. Fernand Etgen, *Président.*** - Merci villmools, Madamm Ahmedova. Nächste Riedner ass den honorabelen Här Fernand Kartheiser. Här Kartheiser, Dir hutt d'Wuert.

■ **M. Fernand Kartheiser (ADR).** - Jo, villmools merci, Här President. Ech mengen, ech fänken och u mat engem Merci un den Här Haagen, deen e ganz komplette Rapport hei gemaach huet an eis dee Projet wonnerbar presentéiert huet. An och vill vu menge Virriedner, muss ech soen, hu ganz Wichteges zu dëser Debatt bäigedroen.

Dofir, mengen ech, kéint ech mech vläicht wierklech op e puer Froen konzentréieren. Awer fir unzefänke wëllt ech och soen, dass mir als ADR selbstverständlech dës Projekte begrëssen an och fro sinn, dass Lëtzebuerg eng Pionéierroll am Weltraum gespillt huet, e Secteur, deen eng Zukunft fir sech representéiert an och zur Diversifizéierung vun eiser Ekonomie natierlech a grousssem Mooss bäidréit.

Mir haten, wéi mer d'Artemis-Accorden ënnerschriwwen hunn, hei eng Question élargie un den Här Minister Fayot gestallt a mir haten e gefrot: Wéi eng Accorde musse mer nach ënnerschreiwen? Dat hei ass eng Deelantwort op déi Fro, wéi mer kucken, wéi mer eis an der Weltraumhaftung, wéi dat heescht, besser ofsécheren. Mee et bleiwen nach Accorden ze ënnerschreiwen. Den Här Minister ka vläicht och duerno dorobber agoen.

An déi Haftung ass vill, vill méi komplizéiert, wéi een et am Ufank vläicht kéint mengen, wat de Fong vun der Haftung ugeet. Et ass nämlech esou, dass verschidde Risiken do matenee verbonnen sinn. A mir gesinn och do an deem neien Domän vun de Weltraumaktivitéiten eng Entwécklung vun deene Froen, déi rechtlech kënnen ëmstridde sinn.

Mir hu mol fir d'ëischt d'Gefährdungshaftung oder d'Schuedenshaftung, dass ass emol eng Saach, wat kann an engem Kader vu legalen Aktivitéite geschéien. Oder wéi eng Schied kënnen aner Staate vläicht zur Geltung bréngen (veuillez lire: verursaachen)? Do hu mer selbstverständlech Ëmweltschied, déi kënnen einfach duerch mechanesch Ursaachen entstoen. Do gëtt et och e Fall tëschent Kanada a Russland, wann ech mech gutt erënneren, ëm Nukleardeeler, déi erofgefall sinn, wou eigentlich dee Versécherungsregime, dee bis elo existéiert huet, déi Zort vu Schued net ofdeckt.

Mee den Här Arendt hat a senger Interventioun gesot, mir kéinten zum Beispill an de Refueling goen am Weltraum, dass heescht, mir géifen och do Komponenten eropschëssen, déi eventuell potenziell Ëmweltschied kéinte verursaachen. An dann ass natierlech d'Fro, wann dat geschitt: Wéi misste mir haften als Staat? Oder wéi kënnen mir eis dedouaniéiere géintiwwer private Gesellschaften, déi dat eventuell kéinte maachen? Also dat ass de Beräich vun den Ëmweltschied.

Mee et gëtt nach méi komplizéiert. Wa mer elo ëmmer méi an de Beräich vun der Kommunikatioun och fir militäresch Zwecker ginn, vu Biller vun Opklärungssatelliten, kann ee sech och virstellen, dass mat der Zäit Litigen entstinn duerch d'Utilisatioun vun deene Kommunikatiounen oder Opklärungsbiller, déi do geliewert ginn. Och dass kann iergendengem Staat oder enger anerer Firma zu engem Nodeel eventuell gereechen. An da stellt sech d'Fro: Hu mir als État de lancement vun esou engem Satellitt eventuell eng Matverantwortung fir e kommerziellen oder anere Schued, deen engem kann entstoen duerch e Lëtzebuerger Satellitt oder e Satellitt, deen eng Lëtzebuerger Konzessioun krut?

Dann hu mer dee ganz modernen Domän och vum Weltraumschrott. Och mir hunn elo well an der Tëschenzäit eng ganz Rei vu Satelliten an esou weider am Weltraum, déi Lëtzebuerger Satelliten sinn oder vu Lëtzebuerger Firmen hei an de Weltraum geschoss gi sinn. An d'Fro stellt sech: Wësse mir als Staat, wiwill Weltraumschrott vu Lëtzebuerger Originn am Abléck douewen ass? Dat gëtt och e kommerziellen Enjeu.

Mir haten elo eng Schwäizer Startup, déi huet elo e Projet, fir dee Weltraumschrott, deen net vun eleng zréck an d'Atmosphär geet, fir do kënnen ze verglën, fir deen ze bremsen, dass en dann awer kann an d'Atmosphär kommen, dass en net fir ëmmer op enger orbitaler Trajectoire bleift. An d'Fro ass: Wéi ass et mat eis? Hu mir en Iwwerbléck iwwert dat, wat mir an der Tëschenzäit u Weltraumschrott verursaacht hunn? An haffe mir derfir? Musse mer eis iergendwéini nom Prinzip vum Payeur-pollueur och dorunner bedeelegen, fir dat ze eliminéieren, wat jo och e Risiko ass fir weider Weltraumprojeten, déi eventuell da gemaach ginn? Well all kleng Schrauf, déi dorëmmer flitt, kann e ganz, ganz schwéiere Risiko duerstelle fir aner Weltraumobjeten an natierlech a fortiori och fir Mënschen, déi douewe sinn.

Dann ass de Problem vun de Krittäre vun esou enger Autorisatioun. Mir stellen Autorisatiounen aus, dass ass elo gereegelt. Mir maachen e Regëster, alles dat ass ganz gutt. Mee hu mir eng Virstellung vun deene Krittären?

Ech wëll lech just e Beispill nennen. Mir hunn hei och Privatfirmen, déi Satelliten, Observationsatelliten, eropschëssen. Mir sinn do an engem Beräich, an enger Grozon vu militärescher oder net militärescher Aktivitéit, jee nodeem. Biller, déi och kënnen zu Zwecker benotzt ginn, fir militäresch Opklärung ze maachen, an engem ganz reng private Beräich. Wat sinn eis Krittären do? Wat wëlle mer autoriséieren? Wat wëlle mer net autoriséieren?

Dat selwecht ass mat engem anere Rechtsprinzip, deen hei spillt, „due diligence“ heescht deen. „Due diligence“, dass verpflichtet eis eigentlech als Staat, dass

ze kontrolléieren, déi technesch Donnéeën, déi mer do kréien. Natierlech hu mer elo e gudd System hei ageféiert, fir ze soen: Déi Firma mussen eis genau soen, wéi se organiséiert sinn, wéi eng Versécherung se hunn, et muss och e seriösen Dossier presentéiert ginn an esou weider. Mee hu mir net och als Staat eng Aufgab, dass ze kontrolléieren, ze kontrolléieren duerch onofhängeg Instanzen? An déi, déi mer hunn, déi si virduen och hei genannt ginn, sinn déi iwwerhaupt outilléiert, fir dee Grad u Kontroll kënnen auszeüben, deen awer vläicht misst gemaach ginn, fir déi „due diligence“, déi Sorgfaltsflicht, déi mir als Staat hunn, wa mer eng Autorisatioun ausstellen, fir där kënnen wierklech glafhaft nozekommen?

An dann hu mer och déi Fro vun eiser eegener Staatshaftung. Maache mir dat iwwert de Staatsbudget? Wëlle mir eis réckversécheren als Staat? Och dass si Froen, déi mer musse kucken. An déi Autorisatioun, déi mir ausstellen, wéi eng Haftung iwwerhuele mir dann als Staat? Et kann een natierlech soen: Mir dedouaniéieren eis da vläicht géintiwwer deene private Gesellschaften, deene mir eng Autorisatioun ginn hunn. Mee hu mir net och eng eege Staatshaftung an esou engem Fall, zemools dann, wa mer déi Aufgab vun der „due diligence“, vun der seriöser Iwwerprüfung net vläicht genuch erfëllt hunn?

Wéi ass et, wa mir net nëmmen État de lancement sinn, well dorëm geet et, mee och selwer Entrepreneur? Mir hunn zum Beispill vu LuxGovSat Aktien als Staat oder bei LUXEOSys, dass ass souguer e staatleche Satellitt. Wa mer also net nëmmen État de lancement sinn, mee als Aktionär zum Beispill och um potenziellen ekonomesche Benefiss vun engem Satellittprojet bedeelegt sinn, wéi ass et dann do mat eiser Haftung? A wéi verséhere mir eis, dass ass alt erëm d'Fro: iwwert de Staatsbudget oder maache mir e System vu Réckversécherung, fir eis Aktivitéiten ofzedecken?

Vill Kolleegen heibannen hunn an hiren Interventiounen d'Regierung encouragéiert, fir weider an de Secteur vum Weltraum ze investéieren. Mir hunn als Lëtzebuerg do wierklech vill gemaach an deene leschte Joren. An dat ass och, mengen ech, souwäit ech gesinn, vun alle Parteien hei aktiv ënnerstëtzt ginn.

Mir haten och als ADR do e puermol Initiative geholl, och an deem Hibleck, fir den akadeemeschen Kader hei weider auszebauen, net nëmmen deen ekonomeschen Kader, mee och deen akadeemeschen. An op der Uni Lëtzebuerg si jo eng Rei Studiegäng an der leschter Zäit geschaaft ginn. Mee mir sollten och probéieren, an dat vläicht als Suggestioun, Här Minister, fir bei den Efforten, déi scho gemaach gi sinn, wéi och mat der Weltraumuniversitéit, déi jo zu Stroossbuerg ass, wann ech mech net ieren, fir och do eng Kooperatioun opzestellen - et war een Abléck souguer eng Iddi, fir se heihinner ze bréngen -, mee op jidde Fall eng Kooperatioun an deem Beräich opzestellen. Well ganz, ganz sécher, op deem Wee, wou mer elo sinn, ass dat eppes, wou mer vill jonk Leit kënnen forméieren a wat wierklech e groussen Deel vun der Zukunft vun der Mënschheet eeben ass. Mir sollten eis däreer bewusst sinn an et wierklech seriö upaken an et konsequent ënnerstëtzen.

Ech soen lech Merci.

■ **M. Fernand Etgen, *Président.*** - Merci villmools, Här Kartheiser. Nächsten ageschriwwene Riedner ass den honorabelen Här Marc Baum. Här Marc Baum, Dir hutt d'Wuert.

■ **M. Marc Baum (déi Lénk).** - Merci, Här President. Ech muss zouginn, dass am Verlaf vun der leschter hallwer Stonn eppes fir mech awer e bëssen Ongewëinlech geschitt ass. Ech muss nämlech zouginn, dass ech déi Debatt suivéiert hunn an dass ech opgrond vun där Debatt decidéiert hunn, anescht ze votéieren, wéi ech am Ufank geduecht hunn, dass ech géif votéieren.

Ech hunn nämlech dem Rapporteur nogelauschtert, ech hunn dem Här Mosar nogelauschtert, dem Här Arendt, der Madamm Ahmedova an dem Här Kartheiser a fir mäin urspréngleche Vott fir deen ee vun deenen zwee Projeten, deen eng Enthalung gewiescht wier, huet sech bei mir d'Iwwerzeegung duerchgesat, dass ee muss dergéint stëmmen. Ech wëll mech erklären.

An ech wëll do ufänken, wou de Rapporteur opgehale huet, nämlech mam Gesetz vum 20. Juli 2017 iwwert de Space Mining, e Gesetz, wou mir als Lénk an der Chamber déi Eenzeg waren, déi dergéint gestëmmt hunn, well mer doranner net nëmmen e Bausteen, mee en zentraalt Element vun der Privatiséierung a Kommerzialiséierung vun den Aktivitéiten ausserhalb vun eiser Atmosphär gesinn hunn, wou et ganz vill Froen gëtt, Froen u Haftung, Froen u internationale Konflikter, awer och natierlech Froen u nohalteger Entwécklung, notament vun de Konzeptionen vun deene Leit, déi déi Iddie virugedriwwen hunn.

Elo ass et esou, dass mer hei zwee Gesetzgeber virleien hunn, eng Kéier d'Adhesioun zu enger UN-Konven-

tioun, déi seet, dass een en nationale Regëster soll hunn a wéi deen nationale Regëster technesch soll ausgestatt ginn, wéi eng Donnéeën do sollen dra sinn, eppes, wou een, mengen ech, näischt dergéint kann hunn. An dat anert, dass ass awer dee Régime d'autorisation.

An aleng schonn dat Argument, dass dat hei e weidere Bausteen ass an deene Bestriewung vu Lëtzebuerg, fir eng Nisch am Outer Space opzemaachen, ass fir eis awer dach méi wéi bedenklech.

Och déi Fro vun der Responsabilitéit, eigentlech d'Kärfro vun deem ganze Projet de loi, dee jo opgrond vun 22 Opposition-formelle vum Staatsrot komplett huet missen ëmgeschriwwen ginn, well déi Fro vun der Responsabilitéit am initiale Projet net gutt genuch gekläert ginn ass, bleift an eisen Aen awer bestoen. An den Här Kartheiser ass effektiv op déi Problematik, mengen ech, och richtig agaangen.

An dann e lescht Element, wou ech geduecht hunn: Dass do ass awer elo wierklech, da muss een do dergéint sinn! Wann een den Tom Hillenbrand liest - deen däitschen Auteur, deen ech och kennen a vun deem ech och e Buch gelies hunn, nämlech „Drohnenland“, wat en 2014 publizéiert huet, e Roman iwwert d'total Iwwerwaachung, déi an der Zukunft soll stattfannen -, an deen neiste Roman „Qube“ - deen hunn ech zwar bestallt, awer nach net gelies, mee ech héieren awer an de Rezensionen och just erëm, dass wier beängstegend, dass wier en dystopeschen Roman -, wann een dee Roman dann als Beispill hält derfir, dass dat awer fir wonnerbar Opportunitéite kéint duerstellen, dann, mengen ech, da sinn ech net nëmmen am falschen Roman, mee och am falschen Film. An duerfir wäert ech dass hei net matstëmmen.

Merci.

■ **Une voix.** - Très bien!

■ **M. Fernand Etgen, *Président.*** - Merci villmools, Här Marc Baum. Leschten ageschriwwene Riedner ass den honorabelen Här Sven Clement. Här Clement, Dir hutt d'Wuert.

■ **M. Sven Clement (Piraten).** - Merci, Här President. Léif Kolleeginnen a Kolleegen, haut schwätze mer dann alt emol nees iwwer Weltraumpolitik. Mee haut geet et dann net ëm ee Satellitt, mee direkt ëm se alleguerten. Lëtzebuerg huet hei schonn e puer Gesetzgeber, wéi d'Gesetz vum Space Mining, ëmgesat. An och international hu mer eis zum Beispill duerch d'Convention sur la responsabilité internationale pour les dommages causés par des objets spatiaux vum 1983 (veuillez lire: 1972) zu engem gewëssenen Handele verpflichtet.

Engersäits geet et jo haut ëm d'Aféiere vun engem nationalen Regëster - do, wou mer all d'Satelliten an d'Rakéiten, déi vun enger Firma ënner Lëtzebuerger Verantwortung an den Himmel geschoss ginn, sollen androen. Dës Regëster soll dann och konform zum Artikel 3 vun der Konvention vun de Vereenten Nationen, déi mer heimadder ëmsetzen, accessibel fir de Public sinn. Domadder gi mer dann emol gewuer, wéi eng Objeten dobaussen alles esou erëmschwirre mat lëtzebuergeschem Pavillon drop.

Anerersäits geet et awer och drëms, Firmen, déi an deem Domän aktiv sinn, kontrolléieren ze kënnen a se zur Verantwortung ze zéien. Am Text vum Projet 7317 gëtt een Autorisations- a Kontrollvolet agefouert a séchergestallt, dass keng Firma, déi ënner lëtzebuergeschem Numm am Weltraum tätig ass, géint eis international Verpflichtungen verstéisst oder eisen internationale Bezéiunge schuede kann.

Och droen d'Firmen d'Käschen, déi bei enger Iwwerprüfung am Kader vun dësem Demandé vun de Beamten vum Wirtschaftsministerium ufalen. Fir all dës Demanden a Firmen ze iwwerprüeuen, brauch de Ministère dann och méi Beamten, fir d'Aarbeitslaascht ze packen. Hei mussen also weider Leit agestallt ginn.

Här President, e grouse Pluspunkt ass d'Tatsaach, dass Firma vum Lëtzebuerger Staat responsabel si fir eventuell Schied. Wann duerch eng vun hiren Activités spatiales e Schued entsteet oder e Schued herno vun enger anerer Firma muss behuue ginn, muss hir Assurance duerfir opkommen. Mee op internationaler Bün, an dass dierfe mer net vergiessen, wäert awer ëmmer de lëtzebuergeschen Staat responsabel si fir d'Feeler, déi eng Privatentreprise gemaach huet. Duerfir ass et vun enormer Wichtigkeit, dass déi Firma richtig kontrolléiert ginn, ier se eng Autorisatioun kréien, fir hirem Metier nozegoen, an dass hir Aktiounen och no der Autorisatioun nach weider iwwerwaacht ginn.

Den zoustännegen Ministère muss hei sécherstellen, dass nëmme seriö Firmen eng Erlabnis vum Staat kréien an dass déi Leit, déi dës Firma leeden, och iwwert dass néidegt Wësse verfügen, fir déi richtig Entscheidung ze treffen. Et muss sech also ëm responsabel Firmen handeln, déi sech der Verantwortung, déi se duerch hir Weltraumoperatiounen hunn, och bewusst sinn.



Domat mengen ech och d'Responsabilitéit, alles, wat se an de Weltraum geschoss hunn, och erëm vun do fortzекреien. D'Jugendparlament hat eis an der Chamber hei am Oktober nach eemol drop opmierksam gemaach, wéi gravéierend de Problem vum Weltraumschrott elo schonn ass.

Am Januar 2019 huet d'US Space Surveillance Network méi wéi 130 net Einzelstécker, mee 130 Milliounen Stécker gezielt, déi ronderëm eis Äerd schwiewen! De gréissten Deel dovunner ass méi kleng wéi een Zentimeter, kann awer bei deene Vitessen, vun deene mer an der Äerdlafbunn schwätzen, gravéierende Schued urichten, wann e kollidéiert. Duerch d'Clean Space Initiative huet d'EU sech verpflichtet, fir besser drop opzepasst. An dat heescht och, datt Lëtzebuerg seng Firma muss an d'Verantwortung zeien.

Wann d'Staategemeinschaft do net an noer Zukunft handelt, wäert et schwéier ginn, fir iwwerhaupt nach Satellitten an de Weltraum ze schéissen. Wat nämlech de Risiko méi grouss gëtt, datt de Satellitt no nëmmen e puer Deeg schonn erëm duerch e Stéck Weltraumschrott onbrauchbar gemaach gëtt, wat et fir d'Firmen och net manner rentabel ass (veuillez lire: wat et fir Firmen och manner rentabel ass), fir an dësem Domän ze schaffen.

Länner wéi Lëtzebuerg, déi aktiv an dëse Secteur investéiert hunn a weider investéieren, géifen am schwéierste getraff ginn. Dat ass e Risiko, deem mer eis bewosst sollte sinn, well och déi beschten Technologie, déi am Moment schonn a Satellitten agebaut ass, fir Weltraumschrott auswäichen ze kënnen, kënnt iergendwann un hir Grenzen.

Här President, léif Kolleeginnen a Kolleegen, een Detail vun dësem Projet wéilt ech awer nach uswätzen. Esou fannen ech, datt d'Iddi vun enger extraer Autorisatioun bei all Satellitt oder anerem Projet, dee soll bei d'Stäre geschoss ginn, net falsch war. Bei esou enger Autorisatioun misst een dann natierlech Dokumenter mat Detailer zum Projet areechen an esou wier dës Autorisatioun dann och nach eemol eppes anescht wéi déi generell Autorisatioun fir d'Firma.

Ech denken, vum Grondsaz hier wier et gutt, wann de Staat iwwert d'Detailer informéiert géif ginn, ier eppes an d'Atmosphär geschoss oder ausserhalb vun der Atmosphär geschoss gëtt. Esou eng Prozedur kéint dann och, ewéi vun der Chambre des Salariés virgeschloen, einfach iwwer e Formulaire op zum Beispill Guichet.lu ëngesat ginn. Dëst Gesetz sollt also wéi all Gesetz an Zukunft ëmmer erëm un d'Realitéit um Terrain ugepasst ginn.

Här President, dëst Gesetz, grad wéi eis Weltraumstrategie, stellt e Risiko fir eist Land duer. Mir Piraten sinn net géint d'Ausbaue vum Weltraumsektor zu Lëtzebuerg. Wéi ech awer scho viru ronn engem Joer sot, si mer der Meenung, datt et heiansdo néideg ass, e Risiko anzegoen, fir weider no vir ze kommen. Virun allem als klengt Land muss een ëmmer op der Sich no neien innovative Weeër sinn, fir seng Wirtschaft um Lafen ze halen, an oppe sinn derfir, och fir all Fortschrétt.

Allerdéngs si mer nach ëmmer der Meenung, datt et am beschten ass, net déi Firmen unzelackelen, déi herno d'Satellitten eropschéissen, mee d'Fournisseure vun de Firmen, déi d'Satellitten an de Weltraum schéissen. Bei de Fournisseuren, déi eenzel Stécker oder Technologie liwweren, ass de Risiko, datt se herno Schued urichten, fir deen d'Land dann herno virun deenen anere Länner muss riichtstoen, nämlech vill méi kleng.

Ech hat schonn deemools e Verglach mam Goldtausch an Amerika gemaach. Während dëser Zäit gouf et déi, déi no Gold gesicht hunn, an déi, déi hinne Saache verkaaft hunn, déi se derfir brauchen, Schéppen zum Beispill. Nom Goldtausch waren d'Schëppeverkeefe déi räich Männer. Vun de Goldgriewer waren der herno awer vill méi aarm dru wéi virdrun, einfach well hiren Erfolleg op rengem Gléck baséiert huet.

Wéi ech schonn deemools sot, géife mir eis wënschen, datt Lëtzebuerg seng Souveränitéitsnische géif notzen, fir d'Schëppeverkeefe unzelackelen amplaz d'Goldgriewer. Et muss een net beim Start vir an der éischter Rei stoen, fir mat als Éischten duerch d'Zil ze kommen.

Ech soen Iech Merci.

■ **M. Marc Goergen** (*Piraten*).- Ganz gutt!

■ **M. Fernand Etgen**, *Président*.- Merci villmools, Här Clement. D'Regierung huet d'Wuert, den Här Wirtschaftsminister Franz Fayot.

Prise de position du Gouvernement

■ **M. Franz Fayot**, *Ministre de l'Économie*.- Merci, Här President. Léif Deputéierten, virop e grouse Merci un de Rapporteur Claude Haagen, deen effektiv e ganz komplette Rapport gemaach huet iwwert en dach ganz techneschen, juristesche Projet de loi, wat et mir dann erméiglecht, mech relativ kuerz ze faassen an och haaptsächlech op déi verschiden Observationen a Froe vun den Deputéierten anzegoen.

Ech freeë mech och iwwert déi dach relativ breet Zoustëmmung hei zu dësen zwee Gesetzter. Dat hei ass, fir en oft gebrauchtent Bild ze gebrauchen, vläicht e kleng Schrëtt fir dës Chamber an dëse Covidzäiten, wou mer vill iwwer aner Gesetzter schwätzen, mee awer trotzdeem e grouse Schrëtt fir de Spacesektor an en particulier fir de Sektour vun de Space Resources hei zu Lëtzebuerg.

2020 war e komplizéiert Joer fir d'Économie en général hei am Land, awer och fir de Spacesektor, dee sech awer trotzdeem gutt entwéckelt huet. Mir hu viru Kuerzem, am November, den ESRIC lancéiert, den European Space Resources Innovation Centre, deen ech zesumme mam Claude Meisch lancéiere konnt. Dat ass e Centre de recherche et d'innovation, deen zesumme mam LIST, mat der ESA gemaach gëtt, dee wierklech hei d'Recherche um europäeschen Niveau am Beräich vun de Space Resources weiderbréngt, awer och en Incubateur opstellt fir Entreprises, déi an deem Beräich aktiv sinn, an där gëtt et der hei eng ganz Rei.

De Laurent Mosar huet gefrot, wivill et der wäeren. Et sinn an deem ganze Spacesektor eng ronn 50 Entreprises an dovunner sinn der 10 % aktiv am Beräich vun de Space Resources. Et ass also e Sektour, dee sech weiderhin, trotz engem komplizéierte Joer, gutt entwéckelt, mat ganz villen Demanden, déi weiderhin un eis erugerecht gi bei der Luxembourg Space Agency. An dat mécht natierlech Hoffnung, dass dat heiten eppes ass, wat sech och weiderhi wäert ganz dynamesch a gutt entwéckelen.

Déi Gesetzter hei si wichteg, fir eeben effektiv déi friddlech Exploratioun an och de kommerziellen Notze vun de Space Resources weiderzebréngen.

Heimadder, mat deenen zwee Gesetzter, wéi gesot, schafe mer e ganz séchere Kader, e gudd juristesche Kader, fir déi Aktivitéite weiderzebréngen, nodeem mer 2017 jo mat eise Gesetz iwwert d'Resources, iwwert de Space Mining den éischte Bausteen derzou geluecht hunn.

An ech géif gären direkt am Ufank och agoen op déi Remarken, déi de Marc Baum gemaach huet an och d'Deputéiert Ahmedova, déi sech Suerge maachen iwwert d'Orientatioun vun dësem Wirtschaftssektor.

Jo, et ass ganz vill am Ufank vun dësem Sektour vun Ofbau, vu Mining - effektiv e ganz extraktiven Usaz - geschwat ginn. An et ass kloer, dass mer e Kader geschaaft hunn, fir effektiv och kënnen déi Ressourcen do sech ze appropriéieren an eeben d'Viraussetzung vun enger kommerzieller Exploitation ze schafen. Mee, an d'Deputéiert Ahmedova huet dat gutt beschriwwen, de Space Resources ass am Fong net wierklech méi - oder dat war et vläicht am Ufank, mee et ass et elo net méi - eng Exploitation mat der Iddi, fir déi Saachen zrëckzebréngen.

Wann ee beim Lancement vum ESRIC derbäi war, wou mer e ganz flotte Film gewisen hunn, deen Derlech och kënnt ukucken um Internet, geet et am Fong an där Initiativ vun de Space Resources vill méi dodrëm, fir Ressourcen, déi am Outer Space vorhande sinn, Regolith, Waasser um Mount, ze benotzen, fir weiderzokommen an der Exploratioun vum Weltall, haaptsächlech mat der Iddi, fir bis op de Mars ze kommen. Also geet et hei wierklech drëm, fir de Sektour weiderzebréngen, deen eis och op eise bloe Planéit ka weiderbréngen.

An ech denken do och ganz staark un d'Ekologie! Et geet hei ëm d'Observatioun, ëm zum Beispill Saache wéi de Precisionfarming, awer och ëm de Klimawandel, wou mer déi Technologien, déi douewen entwéckelt ginn oder déi hei ënnen entwéckelt gi vun deene Betriber, déi sech hei usidelen, mee natierlech mat Applikatiounen, mat Dual-use-Applikatiounen op der Äerd, mee awer och douewen, wou mer wierklech ganz interessant Technologie weiderbréngen kënnen, déi eis, wéi gesot, am Klimaschutz, an der Ekologie am grouse Ganzen, awer och an der Agrikultur an a ganz ville Beräicher zeguttkommen.

Et ass also vill méi komplizéiert an och méi e komplexe Beräich wéi elo reng nëmmen deen extraktiven, privativen Usaz, deen de Marc Baum beschriwwen huet.

■ **Une voix**.- Genee.

■ **M. Franz Fayot**, *Ministre de l'Économie*.- An dat mécht fir mech och wierklech d'Attraktivitéit an den Interêt vun deem Sektour aus. Hei geet et gradesou vill ëm Recherche, ëm Progrès, ëm Technologie wéi ëm eng reng opportunistesch Wirtschaftsnisch. An ech mengen, dat ass dat, wat interessant ass um Sektour vun de Space Resources.

Ech wollt dann nach op e puer Saachen agoen, déi de Laurent Mosar gesot huet. Ech si ganz bei Iech, wann Der sot, dass mer hei mussen oppassen op d'Responsabilitéit. Et ass effektiv esou, dass mer an dësem Beräich als Land natierlech eng Responsabilitéit hu fir déi Entreprises, déi an deem Beräich aktiv sinn, an dofir ass et wichteg, dass mer hei eis Aufgabe maachen, dass mer déi „due diligence“ maache par rapport zu deene Businesspläng vun

deenen Entreprises, dass mer och eis assuréieren, dass se déi néideg Solidité financière hunn, dass se och déi néideg Assurancen en place hu fir hir Aktivitéit.

An dat, wat de Fernand Kartheiser sot iwwert d'Staatshaftung, jo, dat ass richtig. Mee do hu mer hei justement doduerch, dass mer an dësem Gesetz keng Limitatioun hu vun der Responsabilitéit vun den Operateuren an dass mer kënnen iwwer e Rekurs géint déi Operateuren, vun deene mer och kënnen eng Assurance verlaangen, eis ofsécheren als Staat, mengen ech, déi néideg Garantien, dat kombinéiert natierlech mat där néideger Prüfung vun der Bonitéit vun deenen Entreprises, vun der Soliditéit vun hirem Businessplang a vun der Solidité financière, wéi mer dat och maachen an anere Beräicher. Ech denken do besonnesch un deen och net ouni Risk behaftete Sektour vun dem Finanzsektor, mee awer och de Commissariat aux affaires maritimes, dee Schëffer autoriséiert an agreéiert. Alles dat si Secteuren, wou mer iwwer Joerzängt bewisen hunn, dass mer dat ëmmer mat deem néidege Seriö maachen, mat där néideger, jo, mat där néideger Seriositéit. Dofir ass mer dofir hei net baang, dass mer dat och am Beräich vun de Ressources spatiales richtig hikréien.

Bon, en Zwëschebilan, dorobber sinn ech agaan. Och fir op dee Punkt anzegoen: Et si schonn eng Rei Betriber. Bon, et huet natierlech keen eng Demande gemaach, well dat Gesetz hei jo nach net gestëmmt ass, mee mir wëssen awer iwwer eis Luxembourg Space Agency, dass hei eng Rei Betriber schonn an de Starting Blocks sinn, fir eng Demande d'agrément ze maachen, soubal dat Gesetz hei a Kraaft getrueden ass.

Dofir nach eng Kéier: Dat heiten ass wierklech e wichtege Text, deen déi Aktivitéiten do encadréiert. De Rapporteur huet d'Beispill vun ispace gesot, wat jo och weist, wéi, jo, wéi vital dee Sektour ass. Mir hunn domadder eng vun deene véier Entreprises, déi am Kontext vun den Artemis-Accorden a vum Artemis-Programm elo wierklech zrëckbehal gi sinn vun der NASA, fir justement ee vun deene Space Roveren do hierzustellen 2023, eng vun deene Schéppen an deem Beräich, justement ee vun deenen Hiersteller vun engem Instrument, engem Rover, deen dann douewe soll no deem Stébs siche goen, deen da fir 5.000 Euro un d'NASA soll verkaaft ginn.

Och dat ass eng weeweisend Transaktioun, warscheinlech eng vun deenen éischten Transaktiounen, wou d'Matière, déi dohanne fonnt gëtt, verkaaft gëtt un eng Space Agence. Och dat gëtt en Testbett natierlech fir eist Gesetz vun 2017, ze kucken, ob dat juristesche resilient, resistent ass, fir esou eng Transaktioun ze testen.

Voilà! Dofir am grouse Ganze merci villmools fir dee gudd Rapport, fir dee flotten, interessanten Debat a merci fir d'Zoustëmmung zu dësem Gesetz.

■ **Plusieurs voix**.- Très bien!

■ **M. Fernand Etgen**, *Président*.- Merci villmools dem Här Wirtschaftsminister Franz Fayot. D'Diskussion ass elo ofgeschloss.

Mir kommen elo zur Ofstëmmung iwwert de Projet de loi 7270. Den Text steet am Document parlementaire 7270².

Am Intitulé vum Projet de loi misst de Bindestrech bei „New York“ ewechgehoen ginn. Mir géifen dann de Projet de loi mat dëser klenger Ofännerung stëmmen.

Vote sur l'ensemble du projet de loi 7270 et dispense du second vote constitutionnel

Fir d'éischt de Vote électronique fir déi perséinlech Stëmmen.

Duerno maachen ech den Appel nominal fir déi, déi wëllen e Vote par procuration ofginn.

Appel nominal (votes par procuration)

Domadder ass dëse Projet de loi eestëmmeg mat 60 Jo-Stëmmen ugehoen.

Ont voté oui : Mmes Diane Adehm, Nancy Arendt épouse Kemp, MM. Emile Eicher, Félix Eischen (par Mme Nancy Arendt épouse Kemp), Paul Galles (par M. Georges Mischo), Léon Gloden, Jean-Marie Halsdorf, Mmes Martine Hansen, Françoise Hetto-Gaasch, MM. Aly Kaes, Marc Lies (par Mme Diane Adehm), Georges Mischo, Mme Octavie Modert, M. Laurent Mosar, Mme Viviane Reding (par M. Aly Kaes), MM. Gilles Roth, Jean-Paul Schaaf, Marc Spautz, Serge Wilmes (par M. Gilles Roth), Claude Wiseler et Michel Wolter (par Mme Martine Hansen);

MM. Guy Arendt, André Bauler, Gilles Baum, Mme Simone Beissel, MM. Frank Colabianchi, Fernand Etgen, Gusty Graas, Max Hahn, Mme Carole Hartmann, MM. Pim Knaff, Claude Lamberty et Mme Lydie Polfer;

Mme Simone Asselborn-Bintz, M. Dan Biancalana, Mmes Tess Burton, Francine Closener, MM. Yves Cruchten (par M. Georges Engel), Mars Di

Bartolomeo, Georges Engel, Claude Haagen, Mmes Cécile Hemmen et Lydia Mutsch;

Mme Semiray Ahmedova, MM. Carlo Back, François Benoy, Mmes Djuna Bernard, Stéphanie Empain, Chantal Gary, M. Marc Hansen, Mme Josée Lorsché et M. Charles Margue;

MM. Jeff Engelen (par M. Fred Keup), Fernand Kartheiser, Fred Keup et Roy Reding (par M. Fernand Kartheiser);

MM. Sven Clement et Marc Goergen;

MM. Marc Baum et David Wagner.

Freet d'Chamber d'Dispens vum zweete Vote constitutionnel?

(Assentiment)

Et ass also esou decidéiert.

Mir kommen elo zur Ofstëmmung iwwert de Projet de loi 7317. Den Text steet am Document parlementaire 7317⁵.

Vote sur l'ensemble du projet de loi 7317 et dispense du second vote constitutionnel

Fir d'éischt de Vote électronique fir déi perséinlech Stëmmen. D'Ofstëmmen fänkt un.

Duerno maachen ech den Appel nominal fir déi, déi wëllen e Vote par procuration ofginn.

Appel nominal (votes par procuration)

Domadder ass dëse Projet de loi bei 58 Jo-Stëmmen an 2 Nee-Stëmmen ugehoen.

Ont voté oui : Mmes Diane Adehm, Nancy Arendt épouse Kemp, MM. Emile Eicher, Félix Eischen (par Mme Nancy Arendt épouse Kemp), Paul Galles (par M. Georges Mischo), Léon Gloden, Jean-Marie Halsdorf, Mmes Martine Hansen, Françoise Hetto-Gaasch, MM. Aly Kaes, Marc Lies (par Mme Diane Adehm), Georges Mischo, Mme Octavie Modert, M. Laurent Mosar, Mme Viviane Reding, MM. Gilles Roth, Jean-Paul Schaaf, Marc Spautz, Serge Wilmes (par M. Gilles Roth), Claude Wiseler et Michel Wolter (par Mme Martine Hansen);

MM. Guy Arendt, André Bauler, Gilles Baum, Mme Simone Beissel, MM. Frank Colabianchi, Fernand Etgen, Gusty Graas, Max Hahn, Mme Carole Hartmann, MM. Pim Knaff, Claude Lamberty et Mme Lydie Polfer;

Mme Simone Asselborn-Bintz, M. Dan Biancalana, Mmes Tess Burton, Francine Closener, MM. Yves Cruchten (par M. Georges Engel), Mars Di Bartolomeo, Georges Engel, Claude Haagen, Mmes Cécile Hemmen et Lydia Mutsch;

Mme Semiray Ahmedova, MM. Carlo Back, François Benoy, Mmes Djuna Bernard, Stéphanie Empain, Chantal Gary, M. Marc Hansen, Mme Josée Lorsché et M. Charles Margue;

MM. Jeff Engelen (par M. Fred Keup), Fernand Kartheiser, Fred Keup et Roy Reding (par M. Fernand Kartheiser);

MM. Sven Clement et Marc Goergen.

Ont voté non : MM. Marc Baum et David Wagner.

Freet d'Chamber d'Dispens vum zweete Vote constitutionnel?

(Assentiment)

Et ass also esou decidéiert.

10. 7695 - Projet de loi modifiant la loi modifiée du 4 décembre 2019 relative à l'Office du Ducroire Luxembourg

Dee leschte Punkt vum Ordre du jour ass de Projet de loi 7695 iwwert den Office du Ducroire Luxembourg. D'Riedezäit ass nom Basismodell festgelegt. An ech géif d'Wuert ginn un de Rapporteur, den honorabelen Här André Bauler. Här Bauler, Dir hutt d'Wuert.

Rapport de la Commission des Finances et du Budget

■ **M. André Bauler** (*DP*), *rapporteur*.- Här President, léif Kolleeginnen a Kolleegen, beim Gesetzesprojet 7695 geet et ëm d'Ofännere vum Gesetz zum 4. Dezember 2019 iwwert den Office du Ducroire Luxembourg, och nach ODL ofgekierzt. Dëse Projet schreift sech an d'Lignée vum Gesetzesprojet 7563 an, dee mer jo bekanntlech, Dir erënnert Iech, am Juni vun dësem Joer an dësem Haus gestëmmt haten. Ier ech méi op den Detail vum Projet de loi aginn, erlaabt mer, e puer Wuert iwwert den Office du Ducroire selwer ze soen.

Wat ass dat also fir eng Institution? Den ODL ass 1961 als Établissement public an d'Liewe geruff ginn. Zanterhier besteet seng Missioun doranner, fir déi wirtschaftlech a finanziell Relatiounen an engem internationale Kontext ze fërderen, haaptsächlech duerch eeben d'Couverture vun de Risiken am Beräich vun den Exportatiounen an den Importatiounen souwéi den Investissementen.

Duerch eng Konventioun tëscht dem Office du Ducroire an dem Staat, déi de sougenannte Comité